

O le Fale o le Fe'e

Monalisa Saveaalii Malietoa, Iunivesite Aoao o Samoa

'Oto'otoga

O le Fale o le Fe'e, o le fale pou-ma'a, fola-ma'a ma ato-ma'a. Na foa/fau ina ia faafōlīga i se Foga'a poo se papa telē i totonu o le moāna sausau, e pu pu totonu ma e nonofo ai fe'e tetele e ta'ua o tao-lā. O le Fale o le Fe'e na nofoia e Auga-Atua Fe'e e āfua mai i ulua'i Fōlauga po'o le Foafoāga i se vaitau faata'ita'i, po'o le 3000 BC. O le vaitau na pūlea ai e le Atua o Tagaloālagi Fa'atupunū'u ma le Āiga Sā-Tagaloālagi le Vasa Tele. O le vaitau lava lea na iai Aiga Tufuga a le Aiga Sā-Tagaloālagi, e pei o Tufuga Tā-va'a/Fau-va'a, Tufuga Faufale ma Tufuga Ta-Tatau/Ta-Malu. O Aiga Tufuga ia na iai o latou Tui sa ta'ita'ia ā latou 'autau malolosi. O Tui ia e maua mai ai suafa Tui-Le-Tufuga o Apia ma o latou na faua le Fale o le Fe'e. O 'auga o lenei pepa; (i) ina ia saili pe iai ni sootaga o su'esu'ega a le Ausu'esu'e o Tala'eli ma le Talatuu o le Fale o le Fe'e, (ii) ina ia faamatalaina sootaga o le Fe'e i 'Upolu, Salati'a, poo Alaoa, faatasi ai ma ni sootaga i le Foga'a i Fale'ula ma le Āla i Salefe'e sa i le Papa-Galagala, (iii) ina ia faamatalaina sootaga o le Fe'e o loo ola pea e ala i Faalupega o ōnapo nei, (iv) ina ia faamatalaina uiga loloto ma uiga nātia o vaogagana o loo āofia i lenei tūsiga, ma le (v) ina ia sa'ili se vaitau talafeagai na soifua ai le Fe'e mulimuli na ia nofoia le Fale o le Fe'e ma isi Atua o loo āofia i lenei tūsiga. O faafitāūli tele i totonu o Talatuu ma Fāgogo a Samoa—o le lē iloa o vaitau na tutupu ai le tele o mea ma ola ai tagata ma Atua. O lea faafitāūli tele, ua mafai ona fo'ia ina ua mulimulita'ia e lenei su'esu'ega le fautuāga a Gunson (Gunson 1987: 150).

Upu Tatala: Fale o le Fe'e, Vaitau, Faalupega, Vaogagana.

Faatomuaga

O le Talatuu lenei ua faataoto i totonu o vaitau e tolu; (i) o le vaitau o uluai fōlauga (Bellwood 1978a, 1978b), na ōmai ai Atua e pei o le Fe'e, Ve'a, Pe'a, Moa, Pa'a, Tuna, Pili, Sega, Gata ma isi. O le vaitau lava lea e ta'ua foi e Samoa, o le foafoaga (Powell 1892 in Weimer 2002), e pei ona iai le Atua o Tagaloalagi ma le Aiga Sa-Tagaloa. Sa iai foi le Tulī poo Logonoa sa ia mata'ia le foafoaga a le Atua o Tagaloalagi. O le foafoaga lea na foafoa ai Atua e pei o Tala, Popoto, Alao, Taufailematagi ma isi (Kramer 1994: 539–540). O vaitau ia o uluai folauga ma Atua o le foafoaga, ua faataoto i totonu o le 2000 BC–100 BC. (ii) O le vaitau e āfua mai ia Pili poo Polu, o i na avea ai Pili ma Tui-Upolu ma o ia foi na vaevaeina le motu o Upolu i lana fanau e toatolu; o le masaga o Tua ma Ana ma le uīi o Tolufale. O lea vaitau ua faataoto i totonu o le 100 BC–1000 AD. (iii) O le vaitau e āfua mai i le uluai Malietoa o Malietoa Sāvea se'ia ō'o mai i le Malietoa Tanumafili II. O lea vaitau ua faataoto i totonu o le 1000 AD–2000 AD. O lea vaevaeaga ua mafua ona o le fautuaga lenei a Gunson;

Tonga records are not internally consistent beyond the reign of the Tu'i Tonga 'Uluakimata I sometime in the 16th century. Earlier than that, the various independent records conflict with each other. Sāmoan records have doubtful historicity earlier than Malietoa La'auli, and both Tongan and Sāmoan records are suspect in relation to the Tongan overlordship. Indeed it would have been in the interest of both cultures to rearrange history and push the long period of subjection and conflict further back into the past. Traces of the occupation which remain in later traditions are probably the most accurate pointers to the real date of that occupation. (Gunson 1987:150).

O toēga o le Fale o le Fe'e o loo tu i luga o le ogaeleele o Upolu poo Salati'a poo Ālaoa, o le nofoaga sa faasolo iai Atua Fe'e mai lava i uluai folauga ma le foafoaga. O le tusiga lenei, ua mafai ona vaai ai i le Atua Fe'e, e lē o se fe'e moni, ao le tagata ua avea ma Atua. O loo faamauina e (Kramer 1994: 545–547), le Solo ia Ti'eti'eātālaga na fōlau mai i uluai folauga ma ona matua ma latou nofoia le Papa-Galagala. O le Papa lea sa tatala i upu a Talaga, ona matala mai lea o le ala i Sa-Le-Fe'e ma o le ala lea sa puipua e le sau'ai o Mafu'e. O le Fe'e o uluai folauga ma le foafoaga e mafua ai le Aiga Sa-Fe'e, e aofia ai i totonu tagata uma na tapuai ma osi taulaga i le Fe'e, aua sa

aumai ai mana ma valoaga. O le Atua Fe'e sa ia pulea le nofoaga faaleagaga o *Salefe'e*. O le Atua Ve'a sa ia pulea le nofoaga faaleagaga o *Pulotu*. O le talitonuga o tagata Samoa anamua, "*a maliliu Matai ma tagata faimana, ona o lea i Pulotu; ae a maliliu tagata e le o ni Matai ma leai ni o latou mana, ona o lea i Salefe'e*" (Geraghty 1993: 343–384). O Pulotu foi, o le Pu e o iai lotu poo tatalo pe a manaomia e tagata ni fesoasoani, e pei ona, logo i *Pulotu le mapu a Tai'i* pe o le tatalo a Tai'i na logo pe ta'u i Pulotu ao mapuea ma mapusela i lona pologa.

O le igoa o le Atua o Pulotu, o *Saveasi'uleo* (Kramer 1994: 103), o le *Savea* ua toe faaleoina o *Sa-Ve'a* poo le *Aiga o Ve'a*, ao le *si'uleo* o loo mulimuli i tua o le *Saveasi'uleo*, o loo aumai ai *le i* a le *ve'aalagi* pe a faailo tuumalo o Matai ma le *Aufaimana*. A i le *ve'aalagi* i totonu o se nuu, ona faalologo lea o *Toeaiina* ma *Olomatutua*, e iloga maota o *Tamaalii* mai anamua, e malaga a'e ai le *ve'aalagi*, ona i faataamilo lea i luga o le nuu. E faalologa pea *Toeaiina* ma *Olomatutua*, aua e taua tele le vaega o le nuu o le a ifo iai le i mulimuli a le *ve'aalagi*. O le fanua e ifo iai le i mulimuli a le *ve'aalagi*, o iina o le a tuumalo ai se Matai (*Alii, Tuua, Aугаfaapae*) poo se tagata faimana. O le talitonuga lea i mea tau *ve'aalagi* ma a latou faailo, o loo ola pea i Samoa i onapo nei. O le Atua *Pe'a*, o le Atua lea o *Lafai Tao-ulupoo* e ona le *Aiga Sa-Tonumaip'e'a*. O *Lafai* foi lea na tupuga mai ai le *Aiga Sa-Lafa'i*, na latou uluai nofoia le motu tele ua faaigoaina o *Salafai (Sa-Lafai)* poo le *Aiga Sa-Lafa'i*. O le suafa *La-fai* foi, ua faasino i le Atua o le *La (Sun)* ma ua faamatalaina o le atalii fai o le *La (adopted son of the Sun)*.

O Atua o uluai folauga ma le foafoaga, o *Tui faimana malolosi*. A feagai ma tagata, ona fai lea o o latou *Tuiga Ulufe'e, Uluve'a, Ulupe'a, Ulumoa, Ulupa'a, Ulutuna, Ulupili* ma isi. O Atua *faituiga* nei, e mafua ai le upu *Tuiga*, o *Tui* foi nei latou te taitaia autau a itumalo ma tafa-itumalo (sub-districts). O o latou *tuiga* e faailo ai o latou faasinomaga faa-Atua ma faataitaiu pe a tutu autau a nuu ma itumalo o Samoa. Sa malu ma saogalemu ai tagata i o latou mana, o latou malolosi ma le matautia o a latou autau. O o latou faasinomaga faa-Atua, sa mafua ai ona auaso iai tagata (*tulou*), e faatupu ai o latou mana pe a toatele agaga o tagata e talialo ai. O Atua nei, sa iai o latou nofoaga faalemafau e pei o *Pulotu* ma *Salefe'e*, e o iai agaga o tagata pe a maliliu. E tusa ai ma *suesuega* a *Horatio Hale* i le *Pulotu* poo *Burotu*, (*Hale 1846: 119–120*), na toe faaauau e *Paul Geraghty* e faapea, o *Pulotu* sa tu i le motu o *Matuku* i *Fiti (Fiji)*. O *Salefe'e*, e tusa ai ma talatuu a Samoa, e tu i lalo o le sami o *Falealupo* ma ua toe faaigoaina, o le *Fafa* o *Saualii*.

O le *vaitau lava* lea o uluai folauga ma le foafoaga, na igoa ai le itumalo ogatotonu o *Upolu* ia *Sa-Āgagā*. O le mau e faapea, o *Sa-Āgagā* sa tausi ai Atua autu ma faatonutonu atu ai isi tama'i Atua o loo i isi vaega o Samoa. O Atua *Fe'e* sa faasolo i *Foga'a* poo *Faleula* ma Atua *Fee* sa faasolo i *Upolu/Salati'a/Ālaoa*, e ona le faitotoa i *Salefe'e* sa i le *Papa-Galagala*. O le Atua *Pe'a* sa nofo i *Le-Pe'a* poo *Lepea* i onapo nei. O le Atua *Ve'a* sa nofo i *Le-Vi* i *Sa-Le-Imoa* ma lona Tia ua faaigoaina o *Tiā-Vi* i gauta o le *Vaimauga*. O le Atua *Tuna* sa nofo i *Pesega* o *Vai* i *Faleata*. O le Atua *Pa'a* sa nofo i *Puipa'a* i *Faleata*. O le Atua *Gata* poo le *Tafa'igata* sa nofo i *Tāfa'igata* i *Faleata*. O Atua o le *Foafoaga*, o *Tulī* ma *Tala* sa nonofo faatasi i ga'uta o *Malie* ma *Fogaa* ma o iina na fai ai *Tōfiga* a *Malietoa Sāvea* ua faaigoaina, o *Tōfiga* nai *Tulimatala* poo *Tōfiga* nai *Tulī-ma-Tala*. O le Atua *Pusi* sa nonofo faatasi ma le Atua *Sega* i *Si'usega*, ua tuu faatasi iai le *Si'u* o le 'afapusi o *Si'use'ia* mai *Apolima*, ma le *Sega* a *Tui-Manu'a* mai *Manu'a*. O suli o le *Sega* lea na latou nofoia le *Mauga Ōlosega* o loo i ga'uta o *Malie* ma o loo tuaoi ma *Si'usega* ma *Nu'u*. O le Atua *Moa* sa i *Apia* ma le *Papa-Galagala*, ma o suli o *Tagaloalagi* e tupuga mai ai le *Aiga Sa-Moā*, e mafua ai le igoa o le atunuu o Samoa.

O le vaitau lava lenei o uluai folauga ma le foafoaga, na pulea ai e le Aiga Sa-Moā ma lo latou Tui-Manu’ā le tele o atumotu o le Vasa Tele (Tui-Manu’ā, Website). O le Tui-Manu’ā poo le Tui-Moa e faapea, o le Atua Tagaloalagi lava lea o le foafoaga, na liutino ifo mai le lagi ma taape solo lona Aiga Sa-Tagalaoa i le Vasa Tele. O le Aiga Sa-Tagalaoa lea, sa iai ō latou Aiga Tufuga Fau-fale, Tufuga Tavaa/Fau-vaa ma Tufuga Ta-Tatau. Na sosolo mai ō latou tomai ma ō latou faatufugaga i le Vasa Tele e aofia ai ma Samoa. O le vaitau foi lea, e faapea na fafasi ai e Pulotu le motu o Papatea, ona sosola mai lea o Tui-Tapuitema ma lona auaga i Samoa ma latou nofoia Falealupo (Kramer 1994: 103). O le Aiga Sa-Tapuitema lava lea na sosolo mai i le Papa Galagala, e pei ona iai Paepae o Maota o Tui-Tapuitema (Freeman 1944). O le Aiga Sa-Tapuitema lea, o tagata tetea, e papa’emā, eena ō latou lauulu ma e lē tau i ao, ona e segaia ō latou mata i le la. Na fōūā e Tui-Tapuitema ma ana autau le malo o Tui-Manua, ona auina mai ai lea o Tui-Pili ma ana autau e le Tui-Manu’ā, e faatoilalo le malō o Tui-Tapuitema.

O Tui-Pili o le atalii o le Atua o Tagaloalagi ma o le Atua o le Aiga Sa-Pilī, peitai, o Pili foi, o le atalii o Tagaloalagi o le suli o le Atua Moa. O Tui-Pili o le isi ona igoa o Polu, na faaopoopo iai le *‘U- taulagi* i lona igoa, ona maua lea o lona igoa atoa o *‘Upolu*. O le U- taulagi lea, e pei o A- taulagi o *Ā- ‘Ana* ma *Ā-Tua* ma isi. Na avea Tui-Pili ma Tui-Upolu ma na ia nofoia le Papa-Galagala, ma le ogaeleele o Upolu o loo iai toēga o le Fale o le Fe’e, faatasi ma isi vaega o Samoa e lē o ta’ua i lenei pepa. O le igoa o lona auaga poo ana autau, o le Aiga *Sa-le-‘Upolu* ma ua faasino i Faga-o-alii (Fagalii), Vailele, Letogo ma Laulii, i le mea tonu o loo iai le Papa-Galagala. Ina ua fanafanau le Aiga Sa-le-‘Upolu, ona soosoo lea i le vaega i Sasa’e o le Vaimauga ua ta’ua nei o *Fua-i-‘Upolu*. O aso anamua, sa faaoga vaitafe e tosi ai tuaoi; o Sa-le-‘Upolu e āfua mai Laulii se’ia pā’ia le vaitafe o Vaivase i Fagaoalii. O Fua-i-‘Upolu e afua mai le vaitafe o Vaivase se’ia pā’ia le vaitafe o Loimata o Apaula ma le itu i Sasa’e o le Mauga o Vaea. O loo tu i ga’uta o Fuaiupolu le ogaeleele o loo ta’ua pea i onapo nei, o *‘Upolu* poo *Salati’a* poo *Ālaoa* ma o le nofoaga lea o Atua Fe’e, e pei ona iai toēga o le Fale o le Fe’e.

O le Fe’e o loo masalomia i le Fale o le Fe’e, o le Fe’e sa tapuai ma ositaulaga iai *Āfolau* poo *Mulifanua* i *Ā’ana* talu mai le amataga. E mafua lea manatu, ona o le tele o talatuu o le Fale o le Fe’e, e iai lava le laina faapea; *“o le Fee na tafi mai i Ā’ana ona o lona sauā”*, e ona le Fale o le Fe’e, ma e toatasi lava le Fe’e na tafi mai *Ā’ana* agai i *‘Upolu/Salati’a/Ālaoa*. O onapo ia e toafā Tui-*Ā’ana* sa iai i *Ā’ana*; (i) *o le Tui-Ā’ana o le Malae o le Vavau*, e āfua atu i Tufulele e oo i le Malae o le Vavau (Leulumoega). (ii) *o le Tui-Ā’ana o Afolau poo Mulifanua*, e āfua atu i Satapuala ma Faleatiu, e oo i Manono-uta ma Apolima-uta, (iii) *o le Tui-Ā’ana o Falelātai*, e afua atu i Sa-Matau e oo i Matāutu ma le Faga-i-Ōfu, ma le (iv) *o le Tui-Ā’ana o le Mauga o Māfafa e oo i Vailuu-uta poo Lefaga—mai le Mauga o Māfafa ma Vailuu-uta Lefaga*, e toe tosi faaālavai mai ai e le *Vai o Sina* le auala o le Aiga *Sa-Tui-Vailu’u*, se’ia pā’ia *Vailu’u-tai* o loo iai pea i onapo nei. O le va o Fasitoo-Tai ma Vailuu-Tai, o loo taoto ai le ālavai o le *Vai-o-Sina*, faatoa sua pe a afā ma timuga Samoa. O Tui-*Ā’ana* ia sa puipuia tuā’oi nei e fā o *Ā’ana* mai ō latou fili ma sa malolosi ā latou autau.

O le avea o Tui-Pili poo Tui-‘Upolu, sa ia nofoia vaega eseese o Upolu. O le vaitau lea o le logologoā o tala o le *‘Afa-pusi* o *Si’usei’a* i *‘Apolima*. O le ūsuga lona lua a Tui-Pili, na usu ai ia *Sina-le- ʻasā* le alo o *Si’usei’a*, ona fanau lea o Tolufale. O Tolufale lea e tupuga mai ai Fe’epo ma Fe’eao (*taga’i i le Gafa*), o Fe’eao na faaauau ai suli o le Atua Fe’e o Afolau Mulifanua, ao Fe’epo na faaauau ai suli o le Feepo i le Tuamasaga. O lalo ifo o auvae mauga o Mauga Afolau ma Mauga Lauti i Afolau Mulifanua, o iina na faatu ai le isi malae o le Aigofie e Leatiogie ma o le maota foi lena o le Atua Fe’e

mai anamua. O le uiga o le igoa *Foga'a*, o papa tetele i totonu o le sami lototo, e pu pu totonu ma e nonofo ai fe'e tetele ua faaigoaina o taolā, ona latou te tataōā vaa failā ma gogoto ai.

O le Gafa

E tusa ai ma fuataga o vaiata le-ilolua a le Au-Tusitala-Faasolopito (Historians), o le fuataga e fua iai tausaga faataitai e umia ai e se tagata se suafa Matai—e tolusefulu (30), peitai, o lea fuataga ua le o aofia ai tausaga na soifua ai le tagata. O le Gafa ua lōmia ua faaoga ai le fuataga faataitai e faapea; e taionosefulu (60) tausaga na soifua ai tagata ma o loo iai i totonu o lea 60 tausaga, le 30 tausaga e matai ai ma le 30 tausaga faaopoopo e soifua ai. O lea faiga, ua mafai ai ona tatala i tua le Gafa o le Tui-Tuamasaga ma le Malietoa, e pei ona fautuaina e Gunson. E le gata i lena, ae ua mafai ai foi ona faatausaga faaonaponei ma ua faigofie ai ona iloa vaiata na soifua ai tagata ma tutupu ai mea o le a faamatalaina. O tausaga ua faaigoaina ua na o ni tausaga faataitai.

165 BC–105 BC Tui-Upolu Pili - Na usu faalua ia Sinaleī'asā le alo o Si'useī'a poo Sa'umani Afaese o Apolima/Manono, ona fanau lea o Tui-Tuamāsaga Tolufale.

105 BC–45 BC Tui-Tuamāsaga Tolufale - Na usu muamua ia Sina-i-Ōlo le alo o Tui-Se'efaasisina poo Tui-Mauga-Ōlo, ona maua lea o Tui-Tuamāsaga Moetūpapa.

45 BC–25 AD Tui-Tuamāsaga Moetūpapa - Na usu ia Sinalogonanu le alo o Tui-Lafai Taoulupoo Tofetofē, ona maua lea o Tui Tuamasaga Fuailolo'u poo Fuailolo'o.

25–85 AD Tui-Tuamasaga Fuailolo'u - Na usu ia To'oa Sinalalovasa le alo o Leiataua i Manono, ona maua lea o Tui-Tuamasaga Fuafuamea.

85–145 AD Tui-Tuamasaga Fuafuamea - Na usu ia Sina-Laulelei le alo o Tui-Ūēē Maatū, ona maua lea o Tui-Tuamasaga Fogaatele.

145–205 AD Tui-Tuamasaga Fogaatele - Na usu ia Sina-Āleisā le alo o Tui-Aana Taupega'afa o Afolau, ona fananau lea o le masaga o Tui-Ā'ana Fe'eafo ma Tui-Tuamasaga Fe'epo.

205–265 AD Tui-Tuamasaga Fe'epo - Na usu ia Sinalei'apa'itele o le afafine o Niuafolau (Tui-Afolau/Mulifanua), ona fananau lea o Tui-Tuamasaga Le-Ātiogie, o Malalatea (tama) ma Sina-Lautea 1 lea na usuia e Tui-Manu'a Folasatele.

265–325 AD Tui-Tuamasaga Le-Ātiogie - Na usu ia Sinataua'iupolu le afafine o Ale i Toāmua, ona fanau lea o Malietoa Sāvea ma ona uso e toalima ma lona tuafafine e toatasi.

Ina ua avea Malietoa Sāvea ma Tupu o le Tuamasaga, ona faasolo lea o le Gafa i le suafa Malietoa. O le tulai mai o le suafa Malietoa, o loo atagia ai le le toe faaogaina (mamate) o Atua Fee e toatolu mai nofoaga e tolu; Afolau Mulifanua, Foga Tuamasaga ma Upolu/Salatia/Alaoa.

325–385 AD Malietoa Sāvea - E lua ana usuga. (i) na usu ia Amaamula, le alo o Sa'ena i Tuanai, ona fanau lea o Malietoa Le'upoluāsāvea. (ii) na toe usu ia Luafatāsaga, le alo o Tui-Taemanutava'e o Sili, ona fanau lea o Malietoa Gagaāsāvea (Faigā). O tama ia e toalua, na nofolua i le suafa Malietoa, ona faasolo lea o le Malietoa i le atalii e toatasi o

Malietoa Leupoluāsāvea, ae tofofi le Fale-Ono o Le-Āti-Āgaga i le fanau a Malietoa Gagaāsāvea. O Malietoa Gagaāsāvea, na ia nofoia Fogaa le nofoaga o le Fe'e, ao Malietoa Leupoluāsāvea na ia nofoia Malie ma Vaitoelau, o le nofoaga patino i le Tama a le Tuamasaga poo le Malietoa (Tui-Tuamasaga).

385–445 AD Malietoa Le-Upoluāsāvea – Na usu ia Alainuanua le alo o Tui-Toga-Talaifeiki (tuafafine taufeagai o Poluleuligaga), ona fananau lea o Malietoa Galoa'itofu ma ona tuafafine e toafa, o Sina-Alaileulamoeileula, Sina-Malie, Sina-Fogaa ma Sina-Toga.

445–505 AD Malietoa Galoa'itofu – Na usu ia Sina-Leutogi'avea le alo o Tui-Salailua (Tui-Tolovaa) ona fanau lea o Malietoa Soanailepule.

(Siitia mai i le Gafa o le Malietoa – MSS Thesis, 2015)

O Sootaga o le Gafa i Atua ma le Fale o le Fee

Ina ua tuumalo Malietoa Savea (325–385 AD), ona nofolua lea o lana fanau tama e toalua o Malietoa Le'upoluāsāvea (385–445 AD) ma Malietoa Gagaāsāvea (385–445 AD) i le suafa Malietoa. Ua mafua lea aga, ona o le finagalo o le Tuamasaga e faapea; o loo fou le suafa Malietoa ma se'i tau vaai poo ai o le toalua lea e faasolo ai le Gafa o le Malietoa. O onapo ia ua fo'i mai lo lā uso taufeagai o Poluleuligaga (385–445 AD) mai Toga ma aumai ona tuafafine taufeagai e toalua, o Ala-i-nuanua ma Pate (385–445 AD). Na aumai Alainuanua faanofo ia Malietoa Le'upoluāsāvea, ae ave Pate faanofo ia Malietoa Gagaāsāvea. O lo la uso taufeagai o Poluleuligaga, na faasino iai le pito o Sale'imoa e nofo ai ma sa fau ai lona maota i ga'uta o le pi'oga o loo sosoo ma Mālua. O Malietoa Gagaāsāvea, o le tasi lea Malietoa Faigā sa iai, ona e faigata ana aga faa-Fe'e—e pei ona iai ona aso tagata (tulou). Sa tagatasi uma Atua o anamua, i le aga lea o le fai o ō latou aso tagata. O lona uiga e lē na o le Fe'e sa fai ona aso tagata, sa faapena foi le Pa'a, Tuna, Pe'a, Mōa, Pili ma isi.

O Atua Fe'e o augatupulaga eseese, sa faailo ō latou avea ma Atua Fe'e, i lo latou nofoia o nofoaga sa patino i Atua Fe'e, e pei o Foga'a i Fale'ula ma 'Upolu/Salati'a/Ālaoa. O ō latou igoa foi e pipii iai le upu Fe'e e pei o Fe'epo ma Fe'ea, ma igoa e pipii iai le upu Foga'a, e pei o Sina-Foga'a ma Taatia-i-Foga'a (Sa'onalu). Peitai, sa nofoia foi le Leātiogie Fogaa, ma o le uiga o le igoa *Le-āti-o-Gie*, o le paepae poo le pa o agaga poo aitu. O le igoa Leātiogie, e le o pipii iai le upu Fe'e poo le upu Foga'a, ae faailo lona avea ma Fe'e i lona nofoia o Fogaa. E le gata i lena, ae faailo foi lona avea ma Fee pe a faamatala lona igoa, aua o loo atagia ai le tele o agaga o loo tāūla iai. O le atalii lona tolu o Leātiogie, na faaigoaina ia *Le-āti-āti-o-Gie*, ua faaluaina ai le malosi ma le telē o le paepae poo le pa o agaga poo aitu. O le tasi lea vaaiga i tagata sa avea ma Fe'e na latou nofoia Fogaa o Atua Fe'e.

O toēga o le *Fale o le Fe'e*, o loo atagia ai se Foga'a poo se Fale-papa, e pei o papa tetele o loo i totonu o le moana sausau e nonofo ai fe'e poo taolā tetele. O le *Tufuga o Tui-Le-Tufuga*, o le Tufuga e suli mai i uluai Tufuga Faufale a le Aiga Sa-Tagaloalagi o uluai folauga ma le foafoaga. O Tufuga ia na ōmai ai foi ma uluai Tufuga e suli mai ai Tufuga Ta-vaa ma Fau-vaa, sa faapitoa o latou tomai i le fauga o alia-tau, alia-folau ma soātau. Sa faapitoa foi o latou tomai i le lalagaga ma le 'āūliga o lā'afa ma lāfala o alia. Sa iloga o latou faiva alofilima ma ua mafua ai lo latou igoa o *Lima* e pei ona iai *Tui-Lima ma le Aiga Sa-Lima*. Sa latou mata'aliaina āva e ofi mai ai alia-tau ma alia-folau i totonu o Taulaga o Vaa. Sa faapitoa foi ō latou tomai, i le to'oga o alia i totonu o le āva ma le tatāāga (talaiga) o lātai ma faatutū e faasavili. O lea faatinoga, ua mafua ai lo latou igoa *Too-ma-lā-tai*. O Tufuga nei, sa iai ō latou tomai faapitoa i le *seiūliga* o alia-folau ma alia-tau i luga o le sami, ae maise pe a

lutaluta le gataifale ma sa faamoemoe iai autau a Saleupolu ma Fuaiupolu i luga o le sami.

O Malietoa Le'upoluāsāvea ma Ala'inuanua, e toafa (4) la la fanau teine ae uii le tama o *Galoā'itofu*; ao Malietoa Gagaāsāvea ma Pate, e toalima la la fanau tama. E taunuu mai Poluleuligaga ma ona tuafafine, o sasao āūgā-āso o Malietoa Gagaāsāvea ma o le Fe'e lea na ia nofoia Fogaa (Faleula) i lea vaiata. O le taimi foi lea, sa sasao mai ai āūgā-āso o le Fe'e i Afolau Mulifanua ma o le Fee tonu lea o loo tuliloaina ona tala. E lua mau e uiga i auga-aso nei; muamua, o tu lava ia ma aga faa-Atua—o le auaso tagata (tulou). Lua, o tagata ia na faasolo mai i auga-aso, o latou ia na faalataina Samoa i vaiata o pulega a Tui-Toga Talaifeiki. Talu ai ona ua mutia le ala o Tui-Toga Talaifeiki i le Gafa o le Malietoa, na mafua ai ona **tilialo** Poluleuligaga i auga-aso o Malietoa Gagaāsāvea.

O le vaiata tonu lea na faatoa fanau ai le atalii e toatasi o Malietoa Le'upoluāsāvea ma na faaigoā loa ia *Galoā'itofu*, ona *na galo ai tofo o ia auga-aso*. O le upu lea tilialo, o lona faafeagai— o le *so'oālo* ma o le aganuu faa-Atua le soalo. Afai o lo'u Tamā o le Fe'e, e auaso iai tagata, o lona uiga e tatau ona soosoo le taligāālo lea i le isi Fe'e ma na tagatasi uma ai Atua. O loo iai pea i onapo nei suafa So'oālo i Ālaoa ma Puipa'a (Faleata), ona sa so'oālo foi le Atua Pa'a ia. O le fanau mai o Galoā'itofu (445–505 AD), na tasi ai le finagalo o le Tuamasaga e faapea; e faasolo le Gafa o le Malietoa i le suli tama e toatasi o Malietoa Le'upoluāsāvea, ae tofofi le *Faleono o Le-Āti-Āgaga* i suli o Malietoa Gagaāsāvea.

O le Faleono o Le-Āti-Āgaga, na tofofi ai tama e toatolu o *Seupule, Niu'aleālii ma Taoāgaga* (445–505 AD) e nonofo i Fogaa/Faleula ma o isi ia suli Fe'e, ae le'i so'oalo ona ua tilialo lo latou Tamā Fe'e, o Malietoa Gagaāsāvea. Na tofi foi Sāvea-Tama (445–505 AD) i Siumu, ae tofi Fua'oletaoāgaga (445–505 AD) i le Vaimauga ma o ia lea na see mai ma nofo i Upolu/Salati'a/Ālaoa, i le vaega tonu o loo iai toega o le Fale o le Fe'e, ona o le atalii o le Fe'e. Na faatoaono le tofiga lea ia Poluleuligaga ma na tofi pea i Saleimoa i le vaega na igoa mulimuli ane o *Fatitū*. O tuafafine e toafa o Malietoa Galoā'itofu o loo ta'u i le Gafa, na tasi i Upolu/Salati'a/Ālaoa, e puipuia ai lo latou saogalemu.

O le filosofia a Samoa anamua se'ia o' mai i onapo nei, *'e oti le tagata ae lē oti le suafa'*, o lona uiga, e faaauau i suli le suafa e pei o suafa Matai ma suafa o Atua. O le Fe'e, Ve'a, Pusi, Pili ma isi, o Atua tasi ia o Afolau Mulifanua ma le Tuamasaga anamua ma o le vaiata o Malietoa Leupoluāsāvea (385–445 AD) ma Malietoa Galoā'itofu (445–505 AD), na ola faaogatotonu ai le Fe'e o loo masalomia i le Fale o le Fe'e. Ina ua ifo auga-aso o Malietoa Gagaāsāvea, e le'i ifo ai auga-aso o le Fe'e o Afolau ma na toatamai tele ai isi Tui-Aana e toatolu ma masii ane loa a latou autau e tafi ese le Fe'e ma Afolau. Ona sulu mai ai lea o le Fe'e i Upolu/Salati'a/Ālaoa, leai ni autau, leai foi ma ni aiga na mulimuli mai ai. O le vaiata o Malietoa Galoā'itofu, na o' mai ai le Fe'e i Upolu/Salati'a/Ālaoa ma na faasino iai e Malietoa le pito i uta o Upolu/Salati'a/Ālaoa e nofo ai, i lalo o le vaiga a Fua'oletaoāgaga ma le Fe'e tamaitai o Sina-Fogaa.

O le faalupega Tui, ua faaogaina i totonu o le tusiga lenei, ua faamatalaina, o le Toa taitaiu e fai lona tu'uga ma sa iloga Tui o autau a nuu ma itumalo i o latou tu'uga. O le faalupega Sina, sa faalupe ai tamaitai tetele o Samoa ma sa patino lea faalupega i alo tamaitai o Atua, Tui, ma le Aufaimana. O tamaitai ia e tofē o latou Gafa, ona o ūsuga ma faasinomaga o o latou Tua'a. O lenei Talatuu ua tuuina atu ma le agaga maualalo, e le faumalo i isi Talatuu o le Fale o le Fe'e ua faamauina, ae ina ia faamauina le Talatuu ua loa ona tuataliga ma tuugutu mai i auga Malietoa ua mavae. O mau ua folasia i lenei Tusiga, o mau na ta'ula ia Sāveaālii loane Viliamu Malietoa (1914–1994) ma na faasoa

mai e ala i ā ma talanoaga e tele na faia. O le mau a Sāveaālii Malietoa, o la’u mau foi lea.

Peitai, i le faaiuga o le Pepa lenei, e mafai ai ona maua se talitonuga tau talafeagai—pe moni o le Fe’e o loo masalomia e ona le Fale o le Fe’e, afa e leai, o lē fea la Fe’e e ona le Fale o le Fee?

O ‘Upolu, Salati’a, Ālaoā

O tuasivi o atumauga o loo tafe ifo ai Ūlu eseese e tolu o Vaisigano, ma e āfua mai iina ogaeleele o Upolu poo Salati’a poo Ālaoā. O Upolu sa nofoia e Polu poo Pili ma ona auaga ma ana autau. O le ‘auga o lea nofoaga, e nanā ma tausi ai Tui ma Toa malolosi o le Vaimauga ma le Tuamasaga. O le matautia o le malolosi o ia autau na mafua ai le isi igoa o Upolu, o Salati’a ma o le igoa Salati’a ua faamatalaina faapea, sala—o le to ese (tulou) ma le ti’a—o le ao, ma o le igoa faatagata-o-taua. O Tui ia na fesoasoani i le vaaiga o le Taulaga o Vaa i Āpia ma le Taulaga o Vaa o le Papa-Galagala o loo i Vailele ma Letogo. O lo latou nofoaga sa faaagaaga ina ia faigofie ona feosofi agai i Tiāvi, Siumu ma Safata. Sa iai o latou taitoalua ma fanau ma o ā latou aga masani, o le aotau, lelepa ma faamagoto i alavai o le Vaisigano. O le leōga ma le puipuiga lea o le alavai e Fuaiupolu, ina ne’i ui atu ai le fili (autau ese) i lo latou nofoaga.

E le gata i lena, ae sa fafaga foi i le sau o le Malietoa (sua ma taumafa o āsiga). O lea faatinoga e mafua ai le alagaupu, e fai’ai Malietoa ae tali’ai Ālaoā. Sa fai foi upu a le Tuamasaga e faapea—“Tainoino e, i le nuu o Salatia, e ā? E lē o magiagia ō latou nifo i le aai i le sau o le Malietoa?”. O mata o le vaitafe o Vaisigano, ua faaigoaina o Ūlu; peitai, o le upu Ūlu, e faaigoa ai soo se ūlu o soo se vaitafe i Samoa. A pā mai Ūlu o le Vaisigano, ona sua eleelea lea ma tafefea mai ai otaota eseese, e mafua ai le isi alagaupu patino i le Vaisigano; e ā Ūlu tāfega ae seletutia ai Vaisigano. E tolu Ūlu eseese o le Vaisigano, o le Ūlu muamua i le itu i Sasa’e, e maua ai le Afu o So’aga, o le Ūlu lona lua poo le Ūlu ogatotonu, o loo tafe mai i tafatafa o le Fale o le Fe’e, ao le Ūlu lona tolu i le itu i Sisifo, e maua ai le Afu o Tapu. O le igoa o le Afu o Sō’aga, e mafua mai i le Lupe a Upolu/Salati’a/Alaoa, e igoa o le Lupe-o-le-Sō’aga; e lanumeamata atoa, peti ma lapo’a, ona o le lupe-po’a. A vaevae lona igoa ona maua lea o upu so’a ma le g-a e faanauna ai le upu so’a. O loo atagia mai i lona igoa, le faatinoga o lana galuega faalupepo’a, a lelei ona faatino lana galuega i lupe-fafine, ona fofoa mai ai lea o Lupe o Fōāga e tele, poo tamai lupe e tele. O vaitau ia o seugalupe a Samoa, ma o loo tumu Upolu/Salati’a/Ālaoa, i fogātia na faafelele ai Lupe Māūnu. Sa ‘a’ami foi ma tālia ai lupe fafine o fuifuilupe latou te āfea togavao o Upolu/Salati’a/Alaoa. O ia lupe fafine ua faaigoaina, o Lupe-tali-‘a’ami ma o pā’aga foi ia a Lupe-so’a poo Lupe o le so’aga.

O le igoa *Vai-sigano*, ua mafua mai i fua o tama’i fala poo fasa ninii ua faaigoaina o *sigano*. O sigano e ola i tafāvai ma sa taatele i na onapo le faaoga o fua manogi o laau, e faamanogi ai *lau-fīsoa* sa taele ai tagata. O fīsoa o isi ō latou igoa, o *moli*, e ‘ōā ae lē manogi. Ina ua ōmai *Papalagi* ma a latou moli-tāmea ma moli-tā’ele, na matauina e ō tatou tagata, e ‘ōā, ona ave tonu lava lea iai o la tatou upu, moli—e faaigoa ai moli a Papalagi. E tu’i le fua o le sigano ia pala, ona afifi faatasi lea ma laufīsoa i totonu o pulu taele, e faa’oa e le fīsoa poo le moli ae faamanogi e le sigano. Peitai, e lē na o le sigano sa faamanogi ai taelega a Samoa, e iai foi lau-āsi, lau-usi ma moso’oi ma isi. O nutigā laufīsoa poo moli nei, e tafefea ma to’a i futi-āfu, e mafua ai le alagaupu, *ua atoa moli i futi-āfu e tasi*.

O le aganuu o mea tau taelega ma mea tau vai, e tupu mai ai le *tapu* (sā) lenei o vaitafe ma soo se vai e taele ai tagata i aso anamua. O le tapu e faapea—*e sā tamaitai ona taele i mata o vai*. O le

mafuaaga, ona sa talitonu Samoa anamua, o tamaitai e eleelea ona o ō latou aafiaga faanatura (tulou); e le gata i lena ae o isi foi tamaitai o failele, ae ō atu foi ma le luuluuga tamaiti e gaēpu ma eleelea ai le mata o le vai. O le nofoaga o le Fe'e, e pito i uta i le nuu o Upolu/Salati'a/ Ālaoā. O ā uma ni mea eleelea e tutupu mai ai i uta, sa mafai ona selefutia ai le pito i tai. O ituaiga Tapu faailoga tagata faapea, o isi ona igoa i le faasamoa, o le 'avei poo le 'avele.

O le igoa *Ālaoā*, e sau mai le upu *lā'oa* poo le upu *lala'oa*. E faauiga i *faiva lala'oa* o *Ālaoā*, e *tiu ma affi*. E taatele i nuu āūta o Samoa, le aganuu lea, o le tiu ma afifi o ō latou faiva, e mafua ai le alagaupu e *tiu faamata-lā'oa*. A ā'e i matāfaga a latou tiuga malie poo soo se i'a, ona poipoi lea ma afifi i laumeamata; a uma ona tuu lea i ato fu'eumu ma amo i uta. O le auala faa-Tautai lea a nuu āūta, e nanā ai faiva; auā e matagā i le faasamoa le faaaliali fano atu i le ala—ae lē tufā. E ala ona lē tufā, ona o nuu e mamao ese ma le sami, e seāseā ona ō e fagogota. A ō'o ina ō e fagogota, ona matuā la'u lava lea o i'a e faafai'ai ma *fafaga i pe'epe'e*. O le uiga o ia upu, *fafaga* i peepee—a faafana a latou fai'ai i'a, e sui laufa'i laulelei o fai'ai ma toe sasaa iai isi pe'epe'e fou, ina ia aua ne'i mātūtū.

O le fanau teine e to'afā a Malietoa Leupoluasavea, na tausi i Upolu/Salati'a/Alaoa aua le puipuiga o lo latou saogalemu. O le igoa o le teine ulumatua, o *Sina-Alaileula-Moeileula*, ona e faapea, a ala ae loa i le taeao faa'ula loa i le ula fou, a oo foi ina moe i le po, ona toe sui foi lea o le isi ula fou e moe ai. O Alaileulamoeileula, na maliu taupou ma o le Tapuāfanua lea o Upolu/Salati'a/Alaoa e oo mai i onapo nei. O le teine lona lua, na igoa ia *Sina-Malie* ma o le Taupou o Malie ma Vaitoelau. O le lona tolu o *Sina-Fogaa* o le Fe'e lea na ia nofoia le Fale o le Fee i Upolu Salati'a ma o le isi lea Atua Fe'e tamaitai. O le lona fa o *Sina-Toga*, e pine ai le pito Toga o lo latou Tinā o Alainuanua, ma o ia lea na nonofo ma le Fe'e na tafi mai Afolau Mulifanua. O Sina-Malie ma Sina-Fogaa, na usua e Tui o le Aiga Sa-Too-ma-Latai ma le Aiga Sa-Limā na latou pulea le Matā-Utu o le Taulaga o Vaa i Apia, o loo mulivai iai le vaitafe o Vaisigano.

O *Matā-Ūtu* e faamatalaina, o le *mata* o le *āva*, e *ūtu* iai le sami i totonu ma maua ai le Taulaga o Vaa ma e lē tasi se Matā-ūtu i Samoa. O le Matā-ūtu foi lea, e faatutū ai too ma lātai (lāfala ma lā'afa) o alia, ona o le matāfaiōi lea a le Aiga Sa-Toomalatai; o le too mai o alia i totonu o le āva, ona tatā (talai) lea o lafala/laafa ma faatutū e faasavili. A oo foi o le a toe folau pe masii foi se autau o luga o le sami, o le Aiga Sa-Toomalatai foi e toe faatutuuā lā o alia folau ma alia tau ma faatonutunua le to'oga o alia i fafo o le āva. O le Fuāvaa tele lenei a Fuaiupolu, sa faaigoa o le *Fua-Tā a le Matāfaga-Tele*, ma o le *Matāfaga-Tele*, e afua atu i Apia e oo i Moataa. O le uiga o le *Fua-Tā*, o le fuāvaa e malosī lana Tā poo le faaogaina o aupega i luga o le sami.

O lātai o alia e fono ma lātai pala e manaomia le toe sui, sa gafa lea ma le Aiga Sa-Limā, sa faapitoa o latou tomā i le fonoga, lalagaga ma le 'āūliga o lātai o alia. O loo iai pea le vaega o le Papa-Galagala e ta'ua o *Ma'a-lā-āūli*, e pine ai le vaega o le Papa-Galagala sa 'āūli ma tatao faamafolafola ai lātai a le Aiga Sa-Limā. O le Aiga Sa-Toomalatai ma le Aiga-Sa-Lima, sa faamoemoe iai le Fua-tā a le Matāfagatele i o latou tomā ūlivaa. O o latou tomā ūlivaa e mafua ai le suafa *Sei-uli* (o le *sei* e aumai mai le upu *masei*), ona sa iloga Taulaga o Vaa na nofoia e suli Tagaloalagi mai le vavau, poo *Ālātaua*—sa iai ā latou ūlivaa faapitoa mo vaitau āfā o Samoa. O le vaitau lea e lē toe ō ai ni vaa i luga o le sami, se'i vaganā alia ma vaa e ūli e le Aiga Sa-Limā.

E lua mau e uiga i le igoa o le Taulaga o Vaa o Āpia; muamua, o le sami lea e ūtu mai i totonu o le mata o le āva (Matā-Ūtu), e mafua ai ona piapiā totonu o le Taulaga o Vaa. A faapuupu le upu *piapiā* i le *piā*, toe faaopopo iai le *A-taulagi*, ona maua lea o le igoa *Ā-piā*. O lea foi mau ua mafai

ona toe saga faamatalaina, o le Taulaga o Vaa *e āpi iai galu i lona āpitāgalu*. O le mau lona lua, ua faamatala ai le upu *Āpisā* ma le upu *Āpiā*, i vaaiga eseese e lua. O le āpisā, o le nofoaga ua faasaina mo tufuga ese mai se isi nuu/itumalo, a uma la latou galuega, ona toe fo'i lea; ao le Āpiā, ua faauiga i le nofoaga e āpi ai Tufuga e faasino tonu iai lea nofoaga, e lē toe foi, ona o Tufuga o le vavau a Tagaloalagi, na ifo sa'o mai le lagi ma Āpi-ā i Āpia.

O Tuiletufuga o Āpia na faūā le Fale o le Fe'e ma e iai le talitonuga, o le Fale o le Fe'e ua loa ona iai mai Fe'e o le foafoaga ma uluai folauga. O Tuiletufuga, e lē gata o le Tui ao le Tufuga foi a le Tuamasaga ma Afolau, ma sa faūā maota o le Malietoa i Upolu/Salati'a/Ālaoā ma isi vaega o le Tuamasaga. O Tuiletufuga o le suli Tufuga o Tagaloalagi poo le Atua Moa mai le foafoaga. E toe soosoo pea le mau e faapea, e fanau tama le Fe'e ma na tālia e le auaiga o le Fe'e ma le nuu o Upolu/Salati'a/Ālaoā, le fanau mai o se teine. Na fanaua e le Fe'e ma Sina-Toga tama e tolima ma e iai i totonu o lea tolima le masaga o *Ūlu ma To'otua*. O uiga o igoa o le masaga lenei, o loo nanā mai ai aga faa-Tui a Upolu/Salati'a/Ālaoā i le faataunuuga o lo latou igoa—o Salati'a.

Na fai le tautinoga a le Fe'e i lona auaiga e faapea, "*a faapea e fanau so'u afafine, ona taga lea o tamaitai ma fafine o lo'u auaiga ma lo'u nuu ona taele i le mata o le vai.*" E le'i talitonu le pito i tai o Upolu/Salati'a/Ālaoā i le tauloto faisoo lea a le Fe'e, na maualuga i o latou manatu, e iai se fai'ai o le Fe'e e manatu ane ai i Tui o loo i le pito i tai. Ina ua fanau le afafine o le Fe'e, na alu le tuli a tamaitai ma fafine ua tulioso i le mata o le vai ma o le vai muamua foi lea o Samoa, na tatala ai le 'avele faailoga tagata lea a Samoa i mea tau taelega i vai. O le afafine lea o le Fe'e, na faaigoa ia *Sina-Le-avele* poo *Sinave* e pei ona faapuupuu ai e Upolu/Salati'a/Ālaoā anamua. O loo iai pea i gā'uta o le Fale o le Fe'e le Āfu e igoa ia Tapu, o le āfu lea o loo pine ai le alavai tonu na 'avele. O puua o le togavao o Upolu/Salati'a/Ālaoā, na maua ai igoa e faaigoa ai ā latou autau, ma o loo olaola pea i nuu o Fuaiupolu suafa; Puua-uli, Puua-'efu, Puua-'ena, Puua-segisegi, Puua-sina (pa'epa'e) ma Puua-latamai.

E pei ona tā'ua i luga, e tolu Ūlu o le Vaisigano, e tosi mai ai alavai e tolu. Peitai, o alavai ia e tolu, a oo ina pa pa, ona fetosiai solo lea i totonu o Upolu/Salati'a/Ālaoā. E olaola tetele ma o loo malosi pea le alavai e tosi mai totonu o Tapu, ui faalava mai i gā'uta o le Fale-o le-Fe'e ma tofu i totonu o le alavai o Sō'aga. O gatai mai o le Fale o le Fe'e, e toe fetosiai ai foi alavai o Ūlu nei e tolu, ma o le malolosi o fetauiga o nei alavai e tolu ua maua ai le isi alavai e igoa o Pago. O le alavai lea o Pago, o loo taoto faalava ane i gauta o le dam a Niu Sila ma ua eli atu ai le alavai o le dam ma fafaga mai ai e Pago le dam o loo i Upolu/Salati'a/Ālaoā. O le alavai o Tapu e alu iai i totonu le suavai lē faaaogaina o le dam pe a ova ma tafe ifo ai i le āfu o loo i tafatafa o le vilimaa. O le alavai o le Sō'aga, ua tafe mai ma pu'e ai le suavai taumafa i faatanoa o loo i lalo o le vanu o Upolu/Salati'a/Ālaoā. O lalo ifo o Malōlō-lelei ma le Kolisi o Āvele, o loo ui mai ai le isi alavai ese mai Tiāvi, ona mimilo mai lea i lalo o Avele, pipii mai lea iai ma Tapu o loo tafe ifo i le vilimaa ma tofu loa i totonu o le alavai o Sō'aga. O iina e tasi ai le alavai o loo ui mai lalo o Tanugāmanono ma o le alavai tasi lena mai Ūlu e tolu o le Vaisigano o loo i uta. E tasi atu ai lava iina se'ia oo i le Mulivai i Vaisigano.

O le iai o le Fe'e i le Tuamasaga, e le'i taofia ai lona soli nanā pea o Afolau ma le Aiga i le Tai. O lea aga na toatamai tele ai le Aiga i le Tai ma Afolau, ona masii mai ai lea o ā latou autau e fasioti le Fe'e. Na fafasi sesē e Tui o Upolu/Salati'a/Ālaoā le fuā-vaataa a Manono ma lo latou manatu, o latou na siitaua mai iai. O le autau lea, na fafasi ma tatanu i *Tanugamanono* ma na toatamai tele ai Malietoa Galoā'itofu ma le Tuamasaga, ona e toatele tausoga ma aiga faalotoifale o le Malietoa na maliliu ai. O le toatamai tele o le Malietoa ma le Tuamasaga, na mafua ai ona malele le Malietoa ia

Fuaoletaoāgaga, ina ia fasioti le Fe'e ma faataape le nuu o Upolu/Salati'a/Ālaoā.

E soosoo pea le mau e faapea, o loo tanu le Fe'e i totonu o Upolu/Salati'a/Ālaoā i le vaega o loo iai Tiasā e oo mai i onapo nei. O loo ola pea i le Aiga Sa-So'oalo le suafa *Fe'e-tau*, peitai, ina ua fasiotia le Fe'e, ona ave lea o Sina-Toga ma lana fanau e ave ai le ifoga a Malietoa Galoā'itofu i Afolau ma le Aiga i le Tai. E ui ina oona le fasi a Salati'a, ae na talia faatamāālii e le Aiga i le Tai ma Afolau le ifoga ma foi mai ai Sina-Toga ma lana fanau i Upolu/Salati'a/Ālaoā. Ina ua faataape le nuu o Upolu Salati'a, ona see mai lea o le vaega toatele o Tui i le isi itu o le vanu o loo feagai ma Upolu/Salati'a/Ālaoā ma faaigoa lo latou nofoaga ia *Magiagia poo Magiagi* i onapo nei, e pei o upu a le Tuamasaga na fai i o latou nifo, pe le o magiagia i le 'aiga o sau o le Malietoa. O loo iai i Magiagi le suafa *Fai'ai Malietoa ae tali'ai Ālaoā*. O loo faaigoa foi e Magiagi le igoa *Lupe-o-le-So'aga*, e faaigoa ai lana Aumaga, ana Autaalo ma le pasi. O loo iai foi i Magiagi le suafa *Lupe-tali-'a'ami*.

Na taape isi Toa i Moataa ma o loo iai nei le suafa *Toa* ma lo latou faalupega, o le tagata o le *vavau o Salati'a*. Na faasino foi Sina-Le-'Avele i le isi itu o le vanu e feagai ma Upolu/Salati'a/Ālaoā, i le ogaeleele o loo iai nei le Kolisi o Avele. Na tofofi foi iai e Malietoa Galoā'itofu ona tuagane masaga o Ūlu ma To'otua e puihua lo la tuafafine. O loo ola pea i faalupega o Fuaiupolu i onapo nei le *Maota o Sinave ma le Malaefono o Ūlu-ma-To'otua*. O loo taoto foi i faalupega o Āpia, le suafa *Vainalepa (Vainalelepa)* ma le suafa *Vaisigano*, e pine ai le lelepega a Tui i alavai o Vaisigano. O loo taoto foi i faalupega o Āpia, suli o Sina-Fogaa ma Sina-Malie ua ta'ua o *Ālo o Sina* ma ua faasino i le Aiga Sa-To'omalatai ma isi. O loo ola pea i Āpia ma le Papa-Galagala suli o le Aiga Sa-Lima poo Sa-Limā. E oo mai i onapo nei, o loo lagona pea i Āpia le siufofoga o le Tui na faūā le Fale o le Fe'e—o Tui-Le-Tufuga.

O le vaitau o Siāmani, na faaunuua ai Malietoa Laupepa ma e foi mai ua faatau nanā isi vaega o Upolu/Salati'a/Ālaoā e tagata. Na toe faafoi mai e Malietoa Laupepa ia vaega ma o le vaitau o lona atalii o Malietoa Tanumafili I ma lana Masiofo o Momoemamanū, na avea ai Upolu Salati'a/Ālaoā ma Esetete a Malietoa Tanumafili I. O le vaitau o Pulega a Niu Sila, na talosagaina ai e le Malo o Niu Sila, le 250 eka poo le sili atu foi e pu'e ai le suavai mo le eletise ma le vai taumafa mo le soifua lelei o tagata. O lea ogaeleele e tumu i vanu ma mauga ma ua le mafai ai ona maua sona fuataga sa'o. O lea vaega ua afua mai Ūlu e tolu o Vaisigano o loo i Tuasivi, aofia ai le Afu o Soaga (Itu i Sasae), Afu o Tapu (Itu i Sisifo) ma le ogatotonu o loo iai tōēga o le Fale o le Fe'e.

Aotelega

O le aotelega o lenei tusiga, ua mafai ai ona toe tepa i ona 'auga e pei ona folasia i ona oototoga o loo i luga. (i) *Ina ia saili pe iai ni sootaga o suesuega a le Ausuesue o Tala'eli ma le Talatuu e pei ona faamatalaina*. O suesuega a le Ausuesue o Stair ma Brown (1907) i totonu o le Tusi a Martinson Wallin (2016), o loo masalomia ai Tufuga Mekalifi (megalith builders), peitai o le mau a (Smith 1911) i totonu o le Tusi lava lenei a Martinson Wallin 2016, ua faapea mai ai, "*o fausaga faamekalifi, ua na o ni masalosologa sa taatele i le Ausuesue i na vaitau.*" O masalosologa taatele ia i Ausuesue o na vaitau, ua vaivai ai Tufuga Mekalisi i le Aotelega lenei.

O le talitonuga o lenei tusiga, o tōēga o poumaa ma poupapa o le Fale o le Fe'e—o le Foga'a. O Tuiletufuga foi na tuufaasolo mai ona tomā faatufuga mai Tufuga o le Aiga Sa-Tagaloalagi o uluai folauga poo le foafoaga. O loo atagia i toega o pou ma folamaa, tomā tipi maa ma tipi papa o le Aiga Tufuga na faua Fale o le Fe'e. Peitai, o le igoa Fogaa o loo i Faleula, e le o iai se Fogaa poo se Fale

poumaa pe pou papa, ae o le papa atoa o loo sosolo mai uta e oo i luga o le sami. Talu ai ona e mamao ese Upolu/Salati'a/Ālaoā ma le sami, e mafai ai ona fau se Fogaa i uta e faailo ai le ogaeleele tonu na nofoia e Atua Fe'e.

E tusa ai ma mau a tagata Samoa sa faatalanoa e Freeman, i totonu lava o le Tusi lenei a Martinson-Wallin (2016), o le faaliliuga a Freeman, e mafai ona Fale e tapuai ai i le Atua o Tauga o Fe'e ma o le Fe'e e iai ona sootaga i Fiti ma Tagaloa o Manu'a. Fetui lelei ia vaitau i vaitau o uluai folauga poo le foafoaga, e pei ona sa iai sootaga o le Fe'e i Salefe'e ma le Ve'a i Pulotu i Fiti, lea na ui mai ai uluai folauga (Bellwood 1978a, 1978b). Ae fetui foi i pulega a Tagaloalagi poo Tui-Manu'a o Manu'a i le Vasa Tele. Peitai, o le Fe'e o loo masalomia i le Fale o le Fe'e o loo i Upolu/ Salati'a/Ālaoā, o le Fe'e lea o loo tagatasi ai Talatuu ua faamatalaina ma faamauina i ona faaupuga e faapea; o le Fee na tafi mai Aana ... ma e mafai ona moni ae mafai foi ona le moni lea manatu, ona e le o mafai e poumaa, ma folamaa ona aumai ni faamaoniga o se vaitau tonu na fau ai le Fale o le Fe'e.

O le nofoaga o loo iai toega o le Fale o le Fe'e, na nofoia e Āuga Fe'e e afua mai i uluai folauga ma le foafoaga se'ia oo mai i vaitau o Malietoa Galoā'itofu. O le vaitau lea o Malietoa Galoā'itofu, o loo atagia lelei ai, le pepē o Atua Fe'e sa i Afolau Mulifanua, Fogaa i Faleula ma Upolu/Salati'a/Ālaoā. O le mau, *e oti le tagata ae lē oti le suafa*, o loo pine i lea manatu le vaaiga faapea—*sa tofu lava augatupulaga ma o latou Atua Fe'e sa so'oālo i nofoaga na patino i Atua Fe'e*. O lea foi vaaiga, sa mafai ona tagatasi uma ai Atua. O le mamate o Atua Fe'e, e le faaititia ai le talitonuga o Auga Malietoa ua mavae, i le Tufuga na ia faua le Fogaa poo le falepapa o le Fe'e o loo i Upolu/Salati'a/Ālaoā.

O le 'auga lona (ii), ina ia faamatalaina sootaga o le Atua Fe'e i Upolu/Salati'a/Ālaoā. O sootaga o le Atua Fe'e i Upolu/Salati'a/Ālaoā, e afua mai i le vaitau o uluai folauga ma le foafoaga, e pei ona aumai e le Solo ia Ti'eti'eātalaga, le ala i Salefe'e sa i le Papa-Galagala lona faitoto'a. (iii) Ina ia faamatalaina sootaga o le Fe'e mai Afolau/Mulifanua, o loo ola pea i faalupega o onapo nei. O ia lea na faataape ai le nuu o Upolu/Salati'a/Ālaoā ma mafua ai igoa o nuu o Tanugāmanono ma Magiagi. O ia foi na mafua ai le igoa o le Āfu o Tapu ma na ia fanaua Sina-Le-'Avele ma Ūlu ma To'otua, e mafua ai igoa o le Maota ma le Malaefono o Fuaiupolu, o *Sinave ma UlumaTootua*. O lona uiga, ua loa ona iai Fuaiupolu i le vaitau o Tui-Upolu Pili, ae faatoa fai lona Maota ma lona Malaefono i le vaitau o Malietoa Galoā'itofu.

O suafa o loo i Magiagi, o le *Faii Malietoa ae tali'ai Ālaoā*, o le suafa o le vaitau ua suia le suafa Tui-Tuamasaga i le suafa Malietoa. E mafua lea manatu, ona o loo ta'u ai le igoa Malietoa i lea alagaupu poo lea suafa. Peitai, o suafa *Lupe-tali-aami* ma le igoa *Lupe o le So'aga* o igoa o le vavau mai Upolu/Salati'a/Ālaoā ma na soosoo e Magiagi o latou faaogaina. O le suafa *Toa* o loo i Moataa ma lo latou faalupega, *o le tagata o le vavau o Salati'a*, o le suafa o le vavau ae na faauau i Moataa. O le vaitau lava o le Fe'e lea mai Afolau/Mulifanua ma Malietoa Galoā'itofu, na maua ai le faalupega o le Aiga *Sa-Toomalatai ma isi—o Alo o Sina*, ina ua usuia e Tui o le Aiga Sa-Toomalatai suli tamaitai o Malietoa Leupoluāsāvea—o Sina Fogaa ma Sina Malie. O lona uiga, o le suafa Toomalatai o le suafa o le vavau, ao le faalupega Alo o Sina, faatoa maua i vaitau o Malietoa Galoā'itofu.

O le suafa *Tilialo* a Sale'imoa na maua i le vaitau o Malietoa Gagaāsāvea ma Malietoa Leupoluāsāvea. O le suafa *Fe'e-tau* a le Aiga Sa-So'oalo, o le suafa o le vavau, o loo pine ai tomai faa-Tui ma faa-tagata-o-taua o le Atua Fe'e. O le suafa So'oalo foi, o le suafa o le vavau ona na afua mai i vaitau o uluai folauga ma le foafoaga Atua eseese e pei o le; Fe'e, Ve'a, Pili, ma isi na soalo iai augaaso a Samoa. O suafa *Tuiletufuga, Lima, Vainalelepa, Vaisigano, Puaauli, Puaa'ena, Puaa'efu,*

Puaasegisegi ma Puaalatamai, o suafa o le vavau o Upolu/Salati'a/Ālaoā. O loo iai foi le suafa Fe'e i Afolau Mulifanua i le Aiga o Tolofua Falemoe (Fuailolo'o, Afolau Mulifanua) ma le suafa Fe'epo i Fogaa/Faleula).

O le auga lona (iv), ina ia faamatalaina vaogagana natia o loo i totonu o le talatuu na faamatalaina, ma oute talitonu ua manino lea vaega ao faasolosolo le faamatalaina o vaega eseese o le pepa. O le auga lona (v), ina ia tau saili vaitau talafeagai ma o lea sailiga ua faaoga ai le fautuaga a Gunson, ina ia tatala i tua talafaasolopito, tatala atu ai ma le Gafa, ona toe faatausaga lea faaonapo nei, ona fua tonu lava lea iai o mea na tutupu i vaitau o Tui-Tuamasaga ma Malietoa, o loo tā'ua i talatuu.

Tonga records are not internally consistent beyond the reign of the Tu'i Tonga 'Uluakimata I sometime in the 16th century. Earlier than that, the various independent records conflict with each other. Samoan records have doubtful historicity earlier than Malietoa La'auli, and both Tongan and Samoan records are suspect in relation to the Tongan overlordship. Indeed it would have been in the interest of both cultures to rearrange history and push the long period of subjection and conflict further back into the past. Traces of the occupation which remain in later traditions are probably the most accurate pointers to the real date of that occupation. (Gunson 1987:150

O le faaogaina o le fautuaga lea a Gunson, o se fesoasoani tele ia te au ma ua mafai ai ona faafō'ia le faafitauli taatele i talatuu ma fagogo a Samoa—o le lē iloa o vaitau na tutupu ai ia mea ma soifua ai tagata.

O le upu a Tautai matapalapala o le gataifale, e faō le vaa o mala ae laga le vaa o manū. O le auga foi lea o lo matou valaau atu, e pei ona tā'ua i luga, e lē faumālō le talatuu lenei i isi talatuu ua faamauina. E le faumālō foi i talaaga o suafa e pei ona āsā, ao aga faa-lunivesite, e 'avātū 'aumāi. Afai e iai ni faitioga, ni mea e manaomia le sui poo ni mea foi e toe faaopopo, e talia ma le agaga mauualalo, ina ia saga faalelei atili ai le pepa ao le'i lōmia. Pe sa sala le gagana ma soona taele pispisi le faipepa mai Upolu/Salati'a/Ālaoā, faatafea i Mulivai o Vaisigano ma le sami tele.

Faafetai Faapitoa

Faamausili Papaliitele Moli Malietoa
Lima Antonina Elisa Schwalger (Apia/Faatoia)
Lima Puaa'efu Seumanutafa (Apia)
Papaliitele Penehuro Saveaalii Malietoa (Faatoia)
Seiuli Launiusaelua Tafilele Saveaalii Malietoa (Aua/Pago Pago Am. Samoa)
Sooalo Fe'etau Sooalo (Vailima)
Tuiletufuga Siaso Tuiletufuga Tualai (Pulenuu o Apia)
Tu'ua Fasi Gago (Vailima/Pulenuu o Tanugamanono)

Puna'oa

Bellwood, P. 1978a. *The Polynesians. Prehistory of an Island People*. London: Thames and Hudson.
Bellwood, P. 1978b. *Man's Conquest of the Pacific*. Auckland: Collins.
Freeman J. D., 1944. "The Vailele Earthmounds". *The Journal of the Polynesian Society*, Volume 53, No. 4.
Geraghty, P., 1993. "Pulotu, Polynesian Homeland". *The Journal of Polynesian Society*, Volume 102, No. 4. Fiji: Institute of Fijian Language and Culture.
Gunson, N. 1987. "Sacred Women Chiefs and Female 'Headmen' in Polynesian History." *The Journal of Pacific History*, Volume 22, Number 3 July–Number 4 October.
Kramer, A. 1994. *The Samoa Islands Vol. I. An Outline of a Monograph with Particular Consideration*

- of German Samoa*. Auckland: Pasefika Press.
- Martinson-Wallin, H. 2016. *Samoa Archaeology and Cultural Heritage. Monument and People, Memory and History*. Oxford: Archaeopress Publishing Ltd.
- Powell T., in Weimer, C. M., 2002. "The Samoan Story of Creation, Journal of the Polynesian Society Vol. I., Wellington 1892." www.sacred-texts.com/pac/jpolys/ssc.htm (accessed 24 September 2014).
- Saveaalii Malietoa, M., 2015. "O Malietoa – O le Tama a le Tuamasaga." Unpublished Master for Samoan Studies (MSS) Thesis, National University of Samoa.
- Stuebel and Brother Herman. 1995. *Tala o le Vavau: The Myths, Legends and Customs of Old Samoa*. University of Hawaii Press.
- Turner, G. First Edition 1884. "Samoa a Hundred Years Ago and Long Before."
<https://archive.org/details/samoaahundredye00turnngoog> (accessed 01 March 2017).
- Turner, G. Second Edition 1984. "Institute of Pacific Studies, University of the South Pacific."
www.mesc.gov.ws/ssn1/tools_english/samoa_100years_turner.htm
(accessed 05 October 2014).